

05. oktober 2021

UKA2021/152

**Inatsisartut inatsisaat nr. xx xx. xxx 2021-imeersoq Nuummi Qasigiannuani Aasiannilu erngup nukinganik nukissiorfissat taakkunungalu atortussat aningaasalersorneqarnissaannut ingerlanneqarnissaannullu sinaakkusersuutit.**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Matumuuna Inatsisartut inatsisissaattut siunnersuutaat Nuummi Qasigiannuani Aasiannilu erngup nukinganik nukissiorfissat taakkunungalu atortussat aningaasalersorneqarnissaannut ingerlanneqarnissaannullu sinaakkusersuutit pillugit Siumumit imaattumik oqaaseqarfigissavarput.

Inatsissassutut siunnersuut una siorna aasarli 2020-imi piareerneqareersimasoq, kisiannili Covid-19-ip atuutilernerata kingunerisaanik aatsaat maannakkut Naalakkersuisut saqqummiussinerat tunngaveqartoq Siumumiit erseqqissaatigissavarput.

Uumap qulequttap 2019-imi maani inersuarmi sammineqarnerani partiit kikkut qanoq taamanikkut taasisimanerat tikkuartuussutigingikkaluarlugu, qungujulalluta Siumumiit oqaatigissavarput Naalakkersuisuusimasut suliaat nangillugu maanna Naalakkersuisuusut una suliaq saqqummiunneqarnera iluarisimaaratsigu.

Siumumiit anguniakkatta ilagilluinnarpaat imermik, anorisaatinik seqerngullu nunatsinni nukissiutitigut minguitsumik immitsinnut pilersornissatta 100%-ngortinnissaa ukioq 2030 tungaanut. Tamanna pingaarnertut pingasunik aallaaveqartinnissaa Siumumiit pingaartitaraarput, tassalu:

1. Atuisunut (inuaqatigiinnut) sarfap aammalu imeq akikinnerusup atulernissaanut aqqutissiuussinissaq
2. Nukissiutitigut mingutsitsinnginnerusumik suni tamani 2030 tungaanut anguniagaqarnissaq
3. Kiisalu nukissiutitigut nutaaliaanerusunik mingutsitsinnginnerusunik atuilernissaq, taamaasilluni olie-mik ikummatissanillu allanik eqqussuinerit taarserniarlugit soorlu; imermik, anorimit seqinernullu nukinganik.

Tamakkulu anguniakkat Naalagaaffiit Peqatigiit anguniagaannut aammalu nunarsuup sinneranut anguniakkanut naapertuulluinnartuummat, Siumumiit oqaatigissavarput.



Inatsisissatut siunnersuutip nassuiaatitaani aammalu kakkiullugu ilanngunneqarsimasumi maluginiagassat ilagilluinnarpaat, uumap suliap piviusunngortinneratigut ullumikkut inuiaqatigiit nukissiutitigut mingutsitsinngitsumik atuinitta 70%-imiittup 90%-imut qaffariarnissaanik kinguneqassamat aammalu CO2-mik aniatitsinerup 114.000 tons annikillineranik kinguneqassamat.

Naak soorunami sanaartornerit nalitusinnaagaluartut Siumumiik maliginiaqqussavarput, siunissamat aningaasaliissutissatit isigineqassamat inuiaqatigiinnullu 3,5 mia naliganut sipaarutaasussaasut naatsorsorneqarnikummat. Taamaattumik siunissamat ungasinnerusumut aningaasaliineq pitsaasoq aammalu inuiaqatigiinnut imminut akilersinnaasutut nalilerneqarsimasoq Siumumiit ilisimaaraarput. Aningaasaliinissap pingasoqiusanngorlugu nalilersorneqarsimanera Siumumiit iluarisimaarparput, innersuussutigalugulu Scenarie 3-mik aallaavilik; tassa Nuummi Qasigiannuani aammalu Aasianni sanaartornissat ataatsimoorussatut ingerlannissat pitsaanerpaajussasoq.

Siumumiik aamma Naalakkersuisut kaammattorusuppagut nukissiorfinnik minguitsunik pilersitsinissamat inoqarfinni soorlu makkunani pilersitsinissamat tunngavilersuutinik piareersaateqarnissat: Kulusuk, Qeqertarsuatsiaat, Qassiarsuk, Atammik, Arsuk aamma Illoqqortoormiit.

Siumumiik taamatut oqaaseqarluta Inatsisissatunut aaliangiiffigisassatut siunnersuut ilalerlutigu Inuussutissarsiornermut Aatsitassanullu ataatsimiisitaliami sukumiisumik qulaajagassaasinnaasut suliarineqarnissat qulakkeerniarlugu ingerlateqqipparput.

Qujanaq.

Erik Jensen, Siumut